

Carmelia Maissen a «da cuminonza a Ruschein»

■ (cp) Il secund hosp dad uonn en la retscha d'occurrenzas cun il tetel «da cuminonza a Ruschein – la sera dils treis» ei la presidenta communal dalla vischnaunca Ilanz/Glion Carmelia Maissen. Ella ha acceptau cun plascher e spontanadad igl invit per margis, ils 3 d'avrel. Tgi eis ella? E pertgei ha ella studgiau architectura e fa ussa politica?

La Regiun Surselva cumpeglia 15 vischnauncas politicas. Quellas vegnan presidiadas da 14 umens e dad ina donna. *Carmelia Maissen* corrispunda pia buc alla norma ed al cliché d'in president communal. Forsa sa ella declarar a caschun da sia viseta a Ruschein pertgei che las autoritads communalas en Surselva ein stagn masculinas. Ed ella vegn franc era a raquintar tgei che siu studi d'architectura porta oz insumma ad ella sco politichera.

Impurtontas experientschas el mund dalla politica ha la presidenta communal fatg denter auter a Berna. Leu ha ella luvrau duront in onn per ils survetschs dil parlament ed ha saviu mirar davos las culissas da differentas cumissiuns, denter auter quella per ambient, planisaziun dil territori ed energia. E duront ils emprems quater onns dalla vischnaunca fusiunada Ilanz/Glion ha ella empalau e presidiu il



Carmelia Maissen.

MAD

parlament communal, la legislativa. Uss ha ella midau vart e lavura en l'executiva. Tgei bilantscha trai ella suenter prest 100 gis en uffeci? E conta pial dira drova ei oz insumma per far politica? Quellas ed autras damondas – era dil publicum – emp-

ermettan ina sera informativa ed interessanta. Beinvegnidas ein scapescha sco adina era personas d'ordeifer.

Carmelia Maissen: Margis, ils 3 d'avrel 2018 allas 20.15, casa da scola Crestas, Ruschein. Dapli sin www.dacuminonza.ch